



KEMENTERIAN KEMAJUAN
LUAR BANDAR DAN WILAYAH

TEKS UCAPAN

YB DATO' SRI ISMAIL SABRI YAAKOB
MENTERI KEMAJUAN LUAR BANDAR DAN WILAYAH

SEMPENA

MAJLIS KONVOKESYEN KEEMPAT BELAS
UNIVERSITI KUALA LUMPUR 2017
(SIDANG PETANG)

DEWAN PLENARI
PUSAT KONVENSyen ANTARABANGSA PUTRAJAYA

21 OKTOBER 2017, SABTU
WAKTU KETIBAAN: 2.30 PETANG

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Terima kasih Tuan / Puan Pengacara Majlis.

SALUTASI

BISMILLAHIRRAHMANIRRAHIM DAN
SALAM SEJAHTERA

[SALUTASI]

PEMBUKA KATA

1. Dengan lafaz Alhamdulillah, saya bersyukur ke hadrat Allah SWT, yang telah dengan izin rahmat dan kurniaNya jua, memungkinkan kita bertemu sempena Majlis Konvokesyen Keempat Belas Universiti Kuala Lumpur (UniKL) pada petang ini. Seperti para ibu bapa dan graduan sekalian, saya juga turut merasakan teruja menghadiri majlis konvokesyen yang istimewa ini bagi meraikan kejayaan para graduan sekalian. Walaupun padat dengan program Karnival Usahawan Desa (KUD) di PWTC yang kebetulan berjalan serentak dengan majlis konvokesyen ini, saya tetap memberi persetujuan untuk menghadiri majlis ini bukan hanya untuk Sesi Utama tetapi untuk sesi pada petang ini juga bersama – sama para ibu bapa dan graduan sekalian. Untuk sesi ini, saya dimaklumkan seramai 967 orang dari jumlah keseluruhan 8,100 orang graduan akan menerima skrol masing– masing sebentar lagi.

MAJLIS KONVOKESYEN

2. Sempena majlis ini, saya ingin merakamkan ucapan tahniah kepada Yang Berbahagia Dato' Dr Awang Adek Hussin, Pengerusi MARA dan Yang Berbahagia Dato' Azhar Abdul Manaf, Ketua Pengarah MARA di atas lantikan mereka sebagai Pro Canselor UniKL berkuatkuasa pada 1 Oktober 2017 yang lalu. Saya yakin kedua – dua Pro Canselor UniKL yang baru ini akan menjalankan tanggungjawab ini dengan sebaiknya serta menyumbang kepada lebih banyak kejayaan buat UniKL.

3. Saya turut dimaklumkan bahawa majlis konvokesyen pada petang ini akan mencatat satu lagi sejarah dengan menyaksikan perlintakan Prof. Dato' Dr. Mohamad Azemi Mohd Noor, sebagai Professor Emeritus pertama UniKL. Saya difahamkan bahawa beliau merupakan mantan Timbalan Presiden Akademik dan Teknologi, UniKL dan seorang pakar dalam bidang sains dan teknologi makanan yang telah banyak menyumbang kepada UniKL. Tahniah saya ucapkan kepada Prof. Dato' Dr. Mohamad Azemi Mohd Noor atas lantikan ini dan saya harap teruskanlah memberi sumbangan kepada UniKL.

4. Syabas dan tahniah juga saya berikan buat semua para graduan sekalian di atas kejayaan mereka yang diraikan hari ini. Tidak dilupakan ucapan tahniah juga buat semua ibu bapa dan keluarga para graduan sekalian. Pasti kejayaan ini berkat pengorbanan serta iringan doa para ibu bapa dan ahli keluarga sekalian yang membolehkan ijazah UniKL hari ini dianugerahkan kepada para graduan sekalian. Bagi para ibu bapa terutamanya, saya percaya adalah sesuatu yang sangat membanggakan apabila melihat anak mereka berjaya menerima skrol masing-masing pada hari ini dan secara tidak langsung merupakan antara pencapaian utama untuk keluarga. Untuk itu, saya minta semua para graduan sekalian untuk bangun beramai-ramai, pandang ke arah para ibu bapa sekalian dan berikan tepukan yang gemuruh buat insan – insan istimewa ini.

Setinggi-tinggi tahniah dari saya dan seluruh warga UniKL.

Hadirin, hadirat, ibu bapa dan graduan sekalian,

KEJAYAAN UniKL - QS ASIA UNIVERSITY RANKING 2018

5. Saya amat berbangga untuk memaklumkan bahawa buat pertama kalinya UniKL telah tersenarai di antara 400 universiti terbaik di Asia berdasarkan penilaian QS University Ranking : Asia 2018 yang diumumkan baru – baru ini. Penilaian ini melibatkan 11,900 buah universiti di Asia, merangkumi aspek pengantarabangsaan, pengajaran, kebolehpasaran graduan, reputasi akademik dan kualiti penyelidikan. Kedudukan UniKL antara 400 universiti teratas di Asia ini merupakan suatu pengiktirafan antarabangsa terhadap kemampuan UniKL serta membuktikan bahawa inisiatif transformasi UniKL iaitu WE4ASIA yang dilancarkan pada tahun 2014 sudah mula membuahkan hasil dan seterusnya meletakkan UniKL pada kedudukan yang baik. Untuk sebuah universiti yang baru berusia 15 tahun usia penubuhannya, pencapaian ini amatlah signifikan.

6. Saya juga ingin mengucapkan tahniah kepada kepimpinan dan seluruh warga UniKL yang telah juga menyumbang kepada pencapaian ini. Saya yakin UniKL akan menjadikan pencapaian ini untuk terus memperbaiki kedudukannya di Asia.

STATUS SWAAKREDITASI

7. Terdahulu, pada bulan Ogos yang lalu, dua buah kampus Universiti Kuala Lumpur iaitu UniKL Malaysia France Institute di Bangi, Selangor dan UniKL Malaysian Institute of Information Technology di Kampus Kota, Kuala Lumpur telah mendapat Perakuan Status Swaakreditasi daripada Agensi Kelayakan Malaysia (MQA) yang memberi autonomi kepada UniKL mengakreditasi sendiri program pengajian yang ditawarkan di kedua-dua kampus ini. Perakuan ini juga merupakan satu pengiktirafan terhadap kemantapan sistem kualiti dalaman yang dibangunkan pihak UniKL dan telah disahkan melalui audit yang dilaksanakan oleh MQA. Ia juga

merupakan pencapaian yang luar biasa dalam persekitaran pendidikan HTVET tempatan dan di peringkat global.

KEJAYAAN MAHASISWA UNIKL ATLET PARA ASEAN

8. Kejayaan seterusnya dilakarkan oleh Saudara Muhammad Hafiz Jamali, mahasiswa tahun 3 program Bachelor of Engineering Technology (Mechatronics) daripada UniKL Malaysia France Institute, yang telah memenangi pingat perak untuk Malaysia dalam acara Road Race and Time Trial Kategori C4 bagi sukan berbasikal pada temasya sukan SEA PARA KL 2017 yang lalu. Saya yakin kejayaan beliau ini menjadi satu pembakar semangat kepada para graduan sekalian untuk tidak mudah berputus asa apabila berdepan dugaan dan cabaran. Sebaliknya, gunakan dugaan yang datang itu sebagai platform untuk menerokai potensi diri anda yang sebenar.

THE BRANDLAUREATE BEST BRAND AWARD

9. Saya juga percaya bahawa reputasi jenama UniKL di kalangan masyarakat sebagai sebuah institusi pendidikan tinggi terkemuka semakin kukuh apabila UniKL dianugerahkan The BrandLaureate Best Brands Award in Technical Education – Entrepreneurial Technical Learning. Penganugerahan ini turut membuktikan kepercayaan terhadap UniKL dalam menyumbang kepada pembangunan Negara terutama di dalam melahirkan gunatenaga mahir di bidang kepakaran yang kritikal kepada pembangunan Negara dan seterusnya menjadi usahawan yang berjaya di dalam bidang berteknologi tinggi (teknousahawan).

UNIKL MIEWET

10. Saya juga ingin berkongsi beberapa perkembangan terkini dan perancangan masa depan UniKL. Untuk cadangan kampus UniKL Malaysian Institute of Environmental and Water Engineering Technology (UniKL MIEWET) yang akan mengkhusus dalam bidang teknologi kejuruteraan hidro, Unit Perancangan Ekonomi (EPU) telah pun memberikan perakuan kepada peruntukan bajet di bawah Rolling Plan ke 3 di bawah Rancangan Malaysia ke 11 dan kini hanya menunggu kepada pembentangan Bajet 2018 nanti, Insya'allah. Dengan tertubuhnya institut ini nanti negeri Pahang juga akan turut mempunyai kampus UniKL selain dari kampus – kampus UniKL yang telah sedia ada di negeri Kedah, Perak, Wilayah Persekutuan Kuala Lumpur, Selangor, Melaka dan Johor sekarang ini.

ASIA RAIL INSTITUTE

11. Dalam menyokong penglibatan institusi pendidikan MARA dalam bidang teknologi rel yang semakin berkembang pesat di negara kita ini. Sehubungan dengan itu, kewujudan Asia Rail Institute di bawah UniKL ini amatlah bertepatan untuk melahirkan modal insan bagi memenuhi keperluan industri rel ini yang kompeten di dalam bidang yang khusus seperti *Rolling Stock, Signalling &*

Communication, Electrification, Track Work dan Station Management. Asia Rail Institute ini sekarang antara “exclusive training partner” untuk projek MRT, penawaran latihan untuk projek ECRL serta sedang mempelopori potensi kerjasama untuk projek HSRL dan LRT 3.

12. Selain itu, THALES dan SIEMENS juga telah menyatakan komitmen di dalam membantu pembangunan program di Asia Rail Institute kendalian UniKL melalui pembekalan dan penajaan peralatan program Signaling termasuk menjadikan Asia Rail Institute sebagai Pusat Kecemerlangan THALES bagi rantau Asia. THALES juga akan mempertimbangkan untuk mewujudkan satu lagi Pusat Kecemerlangan dalam bidang keselamatan siber melalui kerjasama dengan UniKL. Kerjasama ini saya lihat akan membolehkan UniKL menjadi antara penyumbang utama kepada transformasi lanskap dan ekosistem pengangkutan negara yang merupakan antara fokus utama kerajaan. Ini amat bertepatan dengan hasrat KKLW dan MARA untuk memperkasakan ekonomi negara melalui pembangunan modal insan yang berkepakaran tinggi dalam industri – industri strategik seperti aeroangkasa, maritim dan pengangkutan darat.

MALAYSIA ITALY DESIGN INSTITUTE

13. Sejalan dengan peranannya sebagai pelopor bidang Higher Technical Vocational Education and Training (HTVET) negara, UniKL terus unggul membangunkan program – program pendidikan dalam bidang – bidang baru yang digariskan sebagai kritikal di bawah NKEA. Terkini, UniKL telah menjalinkan kerjasama bersama beberapa institusi latihan dan institusi pendidikan terkemuka Itali bagi memacu pembangunan modal insan dalam bidang industri kreatif dan rekabentuk negara.

14. Jaringan kerjasama ini akan membawa kepada penubuhan Malaysia Italy Design Institute (MIDI) di bawah UniKL. Penubuhan MIDI dilihat akan dapat mengukuhkan lagi hubungan usahasama antara Malaysia dan Itali dari segi pembangunan modal insan serta pemindahan teknologi reka bentuk dan pembuatan industri kreatif serta menjadikannya sebagai pusat kecemerlangan (Centre of Excellence) di dalam bidang reka bentuk.

MEMPERKUKUH POSISI UNIKL MIAT

15. UniKL juga turut mengukuhkan jaringan kolaborasi bersama beberapa pemain industri aeroangkasa dan pengangkutan terkemuka Perancis bagi memperkukuhkan lagi UniKL Malaysian Institute of Aviation Technology (UniKL MIAT). Antaranya UniKL telah menandatangani LOI bersama SAFRAN Aircraft Engines di Paris di mana SAFRAN telah bersetuju untuk mewujudkan Pusat Kecemerlangan dalam bidang penyelenggaraan enjin pesawat di hangar baru kampus UniKL MIAT di Subang. Safran juga menyatakan rasa puas hati dengan syarikat-syarikat Malaysia yang terlibat di dalam program pembangunan vendor

SAFRAN dan bersedia untuk membuka lebih banyak peluang kepada syarikat-syarikat tempatan termasuk menyediakan peluang latihan industri kepada pelajar UniKL dan Institusi Pendidikan MARA.

16. Saya turut menawarkan kepada Airbus untuk membuka final assembly line di Malaysia khususnya di Subang yang amat kondusif kepada Airbus dengan prasarana sediaada termasuk kepakaran dan akses yang diperlukan termasuk tenaga mahir yang dilahirkan oleh UniKL MIAT di kampus Subang kelak.

PEMBIAYAAN KERAJAAN UNTUK MENAMPUNG PERBELANJAAN PENGAJIAN PELAJAR DI UNIKL DAN PERUNTUKAN YANG DISEDIKAN KERAJAAN UNTUK MEMBANGUNKAN UNIKL DAN TABURAN PELAJAR B40 DI UNIKL

17. Sebagai sebuah institusi pengajian milik penuh MARA, adalah menjadi tanggungjawab MARA dan Kerajaan bagi memastikan prasarana dan ekosistem pembelajaran yang kondusif disediakan bagi memastikan setiap pelajar dilengkapi dengan pengetahuan dan kemahiran yang diperlukan untuk berjaya di alam pekerjaan mahupun perniagaan.

18. Dari tempoh Rancangan Malaysia ke-6 sehingga sekarang, Kerajaan telah membelanjakan lebih dari RM1.5 billion untuk menyediakan kemudahan bangunan dan peralatan di kesemua 12 buah kampus UniKL di seluruh Negara. Bagi tempoh Rancangan Malaysia ke-11 pula, sebanyak RM96.5 juta telah diperuntukkan setakat tahun 2017 bagi membiayai peningkatan kampus-kampus sediaada disamping penawaran program-program baru.

19. Dari segi pembiayaan pelajaran pula, pinjaman pendidikan MARA disediakan kepada pelajar-pelajar yang berkelayakan dan rata-rata Patik boleh katakan di sini, hampir 90% graduan yang diraikan pada hari ini dibiayai sepenuhnya atau sebahagian (yuran pelajaran) oleh MARA. Kerajaan melalui MARA amat prihatin dengan kemampuan pelajar Institusi Pengajian MARA (IPMa) khususnya di UniKL untuk membiayai pelajaran mereka kerana majoriti pelajar di UniKL adalah dari kumpulan pendapatan isirumah B40 dan M40. Untuk makluman, 61% pelajar-pelajar di UniKL ini datangnya dari keluarga B40 manakala hampir 90% daripada keseluruhan pelajar datang dari keluarga berpendapatan di bawah RM8,000.

20. Oleh yang demikian, saya akan memastikan UniKL akan terus mendapat bantuan dan sokongan daripada pihak Kerajaan kerana peranan besar yang dimainkan oleh UniKL di dalam meningkatkan taraf hidup rakyat dari kumpulan B40 dan M40 melalui penawaran peluang pendidikan di dalam bidang teknologi dan pengurusan berasaskan industri yang kritikal kepada pembangunan Negara.

PENUTUP

21. Akhir kata, saya mengucapkan syabas kepada UniKL di atas pencapaian yang telah dicapai setakat ini. Saya ingin melihat lebih banyak kejayaan atau break through yang akan dicapai oleh UniKL. Kepada para graduan sekalian, sekali lagi ucapan tahniah dan semoga terus maju jaya dalam bidang yang anda ceburi.

Sekian, Terima Kasih.

Wabillahi Taufik Walhidayah Wassalamualaikum Warahmahtullahi Wabarakatuh.

MAKLUMAN RINGKAS :

SESI 2 MELIBATKAN 967 ORANG GRADUAN IJAZAH SARJANA MUDA (KEPUJIAN) :-

- UNIKL MALAYSIAN INSTITUTE OF MARINE ENGINEERING TECHNOLOGY (UNIKL MIMET) - 280 ORANG
- UNIKL MALAYSIAN INSTITUTE OF AVIATION TECHNOLOGY (UNIKL MIAT) – 254 ORANG
- UNIKL MALAYSIAN INSTITUTE OF INFORMATION TECHNOLOGY (UNIKL MIIT) – 433 ORANG